

Njan aagbaŋ ki JONN ŋmee ki na

Limɔfal aamɔboln

¹ Timi Yesu aakpambalb le ban ke ti tuk nimi limɔfal aabɔr. Tibɔr ngbaan ye Yesu aabɔr la. U nan bi n-yaayoonn na, ki beenin bi. Ti nan ŋun waah len pu na. Tinimbil nan kan u, ki lik mbamɔm waah bi pu na. Tiŋaal nan meeh u. ² Yesu, u ye limɔfal ngbaan na, nan di ubaa mɔk timi. Le ti kan u. Nima pu le ti ji seeraa, le ki tuk nimi limɔfal ngbaan aabɔr. Yesu le ye limɔfal li kaa kpa ndoon na daan. N-yoonn mɔmɔk u nan bi Tite Uwumbɔr chee, le ki di ubaa nan mɔk timi. ³ Ti tuk nimi taah kan pu na, ni taah ŋun pu na, aan ti ni nimi li kpaan kijɔtiik. Ni ye mbamɔn la, taah kpaan kijɔtiik na, ti ni Tite Uwumbɔr ni Ujapɔɔn Yesu Kristo le kpaan kijɔtiik ngbaan. ⁴ Ti ban ke ti li kpa mpopiin mbamɔm, nima pu le ti ŋmee tibɔr timina tii nimi.

Uwumbɔr ye nwiihn la

⁵ Ti nan ŋun tibɔr timina Yesu chee la, le ki tuk nimi. Tibɔr ngbaan le ye ke Uwumbɔr ye nwiihn la. Mbɔmbɔɔn mubaa aa bi u chee. ⁶ Ti yaa len ke ti ni Uwumbɔr kpaan kijɔtiik ki yaa beenin dii mbɔmbɔɔn aasan kan, ti mɔn nnyamɔn la, kaa dii mbamɔn aasan. ⁷ Ti yaa dii nwiihn aasan ke Uwumbɔr aah bi nwiihn ni pu na kan, ti kpaan kijɔtiik tɔb chee la. Le Uwumbɔr Aajapɔɔn Yesu Kristo aasin finni tipobil ki nyani titunwanbir mɔmɔk.

⁸ Ti yaa len ke taa ye titunwanbirdam kan, ti ŋmanni tibaa la; mbamɔn aa bi tisui ni. ⁹ Uwumbɔr ŋani waah len

pu na ki ye mbamɔndaan la. Ti yaa kpiir timi aatunwanbir tuk u kan, u ga di cha pinn timi aatunwanbir, ki finn tipobil, ki nyan tiwan ni kaa ŋan na mɔmɔk. ¹⁰ Ti yaa len ke taa tun titunwanbir kan, ti yin Uwumbɔr unyamɔndaan la. Waabɔr aa bi tisui ni.

2

Yesu Kristo le ye timi aateter

¹ Maabim, maa ban ke ni tun titunwanbir. Nima le cha m ŋmee tibɔr tee tii nimi. Unii mu yaa tun titunwanbir kan, ti kpa uchandatuhn Tite Uwumbɔr chee. Uchandatuln ngbaan ye Yesu Kristo la, uma le ye mbamɔndaan. ² Unan si timi aasisiyyaan ki di ubaa toor kitork tii Uwumbɔr, timi aatunwanbir pu; naa ye timi baanja aatunwanbir pu, binib bimɔk bi dulnyaa ni na aatunwanbir pu. Uma Yesu pu, le Uwumbɔr ga di cha pinn timi.

³ Ti yaa kii Uwumbɔr aamɔb kan, nima le cha ti bee ke ti nyi u. ⁴ Unii yaa len ke u nyi Uwumbɔr, ki yaa kaa kii waamɔb kan, u ye unyamɔndaan la; mbamɔn aa bi usui ni. ⁵⁻⁶ Unii umɔk kii Uwumbɔr aamɔb na, uma le gee Uwumbɔr mbamɔm. Unii umɔk len ke u kpaan Uwumbɔr chee na, u li bi ke Yesu aah bi pu na. Nima le cha ti bee ke ti kpaan Uwumbɔr chee.

Nkaal pɔɔn

⁷ Maanigeekaab, naa ye nkaal pɔɔn le m ŋmee tii nimi. Ni ye nkaal kpok la. Naah nan piin ki dii Yesu aasan na, ni ŋun nkaal ngbaan, le ki di nan saa din. Nkaal kpok ngbaan le ye tibɔr ti ni ŋun na. ⁸ Tɔ, maah bi ŋmee nkaal mu na ye nkaal pɔɔn la. Yesu nan ŋa nkaal ngbaan aah len pu na. Ni mu ŋani mu aah len pu na la. Nimina mɔk ke mu ye mbamɔn. Mbɔmbɔɔn bi jer la. Nwiihn bamɔnn bi wolni la.

⁹ Unii yaa len ke u bi nwiihn ni ki yaa nan una aabo kan, u beenin bi mbombɔɔn ni la, le ki di nan saa din. ¹⁰ Unii umək gee una aabo na bi nwiihn ni la. Tiwan ni ga cha unii lir na aa bi nwiihn ni. ¹¹ Unii umək nan una aabo na bi mbombɔɔn ni la, le ki dii mbombɔɔn aasan. Mbombɔɔn ngbaan job unibil la, nima le waa nyi waah cha nin chee na.

¹² Maabim, Uwumbɔr di cha pinn nimi aatunwanbir Yesu aayibil pu. Nima pu le m ηmee tibɔr tee tii nimi. ¹³ Ntetiib, ni nyi Yesu u nan bi n-yoonn mɔmɔk na. Nima pu le m ηmee tibɔr tee tii nimi. Binachipɔm, ni nyan kinimbɔr ki kaa ηan na. Nima pu le m ηmee tibɔr tee tii nimi.

¹⁴ Maabim, ni nyi Tite Uwumbɔr. Nima pu le m ηmee tibɔr tee tii nimi. Ntetiib, ni nyi Yesu u nan bi n-yoonn mɔmɔk na. Nima pu le m ηmee tibɔr tee tii nimi. Binachipɔm, ni kpa mpɔɔn, le Uwumbɔr aabɔr bi nisui ni, le ni nyan kinimbɔr ki kaa ηan na. Nima pu le m ηmee tibɔr tee tii nimi.

¹⁵ Tɔ, ni taa li gee dulnyaa wee aasan. Ni taa li gee dulnyaa wee ponn ni aawan. Unii yaa gee dulnyaa wee aasan kan, waa gee Tite Uwumbɔr. ¹⁶ Binib aanibil man tiwan ni kaa ηan na pu. Binibil man baah kan tiwan ni na pu. Bi kpa kalmbaani baawan pu. Tiwan nimina mɔmɔk ye dulnyaa wee aasan la, naa ye Tite Uwumbɔr aasan. ¹⁷ Dulnyaa wee ga doo. Tiwan ni binib aanibil man ni pu na, ni mu ga doo. Unii umək ηani Uwumbɔr aageehn na ga li bi n-yoonn mu kaa kpa ndoon na.

Yesu Kristo aadin

¹⁸ Maabim, ni yaa kpee siib kan, kookoo aayoonn ga fuu ni. Ni nan ηun ke Yesu aadin ga dan. Dandana wee Yesu aadim fuu ni ki wiir. Nima pu le ti nyi ke ni yaa kpee siib kan, kookoo aayoonn ga fuu ni. ¹⁹ Binib bi ye Kristo aadim na nyan ti chee. Bi mu aa nan ye timi aanib. Bi yaa ba ye

timi aanib kan, bi ba ga li beenin bi ti chee. Bi nyan ti chee ke ti bee ke bi ponn ni ubaa aa ye timi aanii.

²⁰ Nimi kan, Yesu u ye chain na tii nimi Waafuur Nyaan. Waafuur Nyaan aah bi nisui ni na, nima le ni mòmək nyi tibər ti ye mbamən na. ²¹ Naa ye ke naa nyi mbamən ngbaan le cha m ηmee tibər tee tii nimi. Ni nyi mbamən, ki mu nyi ke nnyamən mubaa aa ye mbamən. Nima pu le m ηmee tibər tee tii nimi.

²² ηma ye unyaməndaan? Unyaməndaan ye unii u len ke Yesu aa ye Kristo u gaa timi lii na. Udaan le ye Kristo aadin. U yii Tite Uwumbər ni Ujapəən mək. ²³ Unii umək yii Uwumbər Aajapəən na yii Uwumbər mu la. Unii umək gaa Uwumbər Aajapəən na gaa Uwumbər mu la.

²⁴ Naah nan piin ki dii Yesu aasan ki di nan saa din na, ni ηun waabər la. Ni li nyi ki cha tibər ngbaan li beenin bi nisui ni. Tibər ngbaan yaa beenin bi nisui ni kan, ni ga kpaan Tite Uwumbər ni Ujapəən chee la. ²⁵ Waah puu tipuur ke u ga tii timi tiwan ni na, nima le ye liməfal li kaa kpa ndoon na.

²⁶ M ηmee tibər tee tii nimi, ke m tuk nimi binib bi ban bi ηmann nimi na pu. ²⁷ Nimi le Yesu nan tii Waafuur Nyaan. Waafuur Nyaan ngbaan beenin bi ni ni. Nima pu na, naa ki ban ke unii ubaa mək nimi waabər. Waafuur Nyaan le mək nimi Uwumbər aabər mòmək. Waafuur Nyaan aah mək nimi pu na, ni ye mbamən la, naa ye nnyamən. Nima pu na, kii man Waafuur Nyaan aah mək nimi pu na, ki li kpaan Yesu chee n-yoonn mòmək.

²⁸ Maabim, ni li kpaan Yesu chee n-yoonn mòmək, aan ti li kpa lipobil ki taa san iniməən u chee bundaln u ga gir ni na. ²⁹ Ni nyi ke Yesu ye mbaməndaan la. Nima pu le ni bee ke unii umək ηani ni ηan na ye Uwumbər aabo.

3

Uwumbør aabim

¹ Lik Tite *Uwumbør* aah gee timi sakpen pu na. U yin timi ke waabim. Le ti mu sil ye waabim. Dulnyaa aanib aa nyi *Uwumbør*. Baah kaa nyi *Uwumbør* na, nima pu le baa nyi ti mu. ² Maanigeekaab, dandana wee ti ye *Uwumbør* aabim la. Taa kee nyi taah ga nan li bi pu na. Ti po nyi ke Yesu yaa nan gir ni kan, ti ga kan waah bi pu na. Nima pu le ti mu ga li naahn u. ³ Unii umək kpa Yesu pu limakl ngbaan na, u ηani ubaa chain la, ke Yesu aah ye chain pu na.

⁴ Unii umək tun titunwanbir na, u ηani *Uwumbør* aakaal aah kə pu na la; ba pu? unii yaa ηa *Uwumbør* aakaal aah kə pu na kan, nima le ye titunwanbir. ⁵ Ni nyi ke Yesu aah nan dan dulnyaa wee ni na, u dan u nan nyan titunwanbir la. Ni nyi ke uma Yesu aa tun titunwanbir tibaa. ⁶ Unii umək bi Yesu ni na aan ki li beenin tun titunwanbir. Unii umək beenin tun titunwanbir na aa kan u, ki mu aa nyi u.

⁷ Maabim, taa cha unii ubaa ηmann nimi. Unii umək ηani ni ηan na, udaan ye unibamənn ke Yesu aah ye unibamənn pu na la. ⁸ Unii umək tun titunwanbir n-yoonn məmək na, u ye kinimbəη aanii la. Ba pu? kinimbəη aah nan piin buyoonn na, ki po tun titunwanbir la. *Uwumbør* Aajarəəon aah nan dan dulnyaa wee ni na, u nan dan ke u nan ηa kinimbəη aatuln yəli la.

⁹ Unii umək ye *Uwumbør* aabo na, *Uwumbør* aabimbin bi u ni. Nima pu, waan ki li beenin tun titunwanbir. Ute le ye *Uwumbør*. Nima pu, waan ηmaa dii titunwanbir aasan. ¹⁰ Unii umək kaa ηani ni ηan na aa ye *Uwumbør* aabo. Unii umək kaa gee una aabo na, u mu aa ye *Uwumbør* aabo. Nima le cha ni beer binib bi ye *Uwumbør* aabim na, ni binib bi ye kinimbəη aabim na.

Ni li gee tɔb

¹¹ Naah nan piin ki dii Yesu aasan ki di nan saa din na, naah n̄un tibɔr ti na le ye ke, “Cha ti li gee tɔb.” ¹² Taa cha ti li bi ke Keenn na. U nan ye kinimbɔŋ ki kaa n̄an na aanii la, le ki ku unaal. Ba pu u ku unaal? Uma Keenn aatuln aa nan n̄an. Unaal ma aatuln nan n̄an. Nima le nan cha u ku u.

¹³ Nnaabitiib, dulnyaa aanib yaa nan nimi kan, taa cha ni gar nimi man. ¹⁴ Taah gee tinaabitiib na, nima le cha ti bee ke ti nyan nkun ni, ki kpa limɔfal li kaa kpa ndoon na. Unii umɔk kaa gee una aabo na, u beenin bi nkun ni la. ¹⁵ Unii umɔk nan una aabo na, u ye unikur la. Ni nyi ke unikur ubaa aa kpa limɔfal li kaa kpa ndoon na. ¹⁶ Yesu nan sil timi aasisiyyaan ki kpo ti pu. Nima le cha ti bee ngeehm aah ye pu na. Ni n̄an ke ti mu ga n̄maa kpo tinaabitiib pu. ¹⁷ Unii yaa kpa liwankpal ki yaa kan una aabo bi igiin ni ki yaa kaa san u kinimbaak kan, Uwumbɔr aageehm aa bi usui ni. ¹⁸ Maabim, taa cha ti li gee binib timɔb ni baanja. Nima ye fam la. Cha ti li gee bi mbamɔm, ki li ter bi. ¹⁹ Nima le ga cha ti bee ke ti dii mbamɔn aasan. Nima le ga cha ti li kpa nsuudoon Uwumbɔr chee. ²⁰ Ti yaa dak tisui ni ke timi aabɔr bii kan, cha ti li teer ke Uwumbɔr jer tisui, ki nyi tiwan mɔmɔk. ²¹ Maanigeekaab, ti yaa bee tisui ni ke timi aabɔr aa bii kan, ti kpa lipobil Uwumbɔr chee. ²² Ti kii waamɔb la, ki n̄ani tiwan ni piir usui na. Nima pu, taah mee u tiwan ni na, u tii timi. ²³ Waah tuk timi ke ti li n̄ani pu na le ye ke: ti gaa Ujapɔɔn Yesu Kristo ki kii, ki li gee tɔb, uma Yesu aah tuk timi pu na. ²⁴ Unii umɔk kii Uwumbɔr aamɔb na, u bi Uwumbɔr ni. Uwumbɔr mu bi u ni. U tii timi Waafuur Nyaan, nima le cha ti bee ke u bi ti ni.

4

Binib bi n̄manni nimi na aabɔr

¹ Maanigeekaab, binib yaa len ke bi kpa Uwumbor Aafuur Nyaan kan, ni taa pak bi mōmōk. Ni lik baah len pu na, aan ki bee ke ni ye Uwumbor Aafuur Nyaan le cha bi len aan naa ye. Biḡmaḡmannim chuun dulnyaa wee ni ki wiir, ki len ke bi ye Uwumbor aabōnabtiib, kaa ye. ² Ubōnabr umāk len ke Yesu Kristo nan kpaln unii ki dan dulnyaa wee ni na, uma le kpa Uwumbor Aafuur Nyaan. Nima le ga cha ni bee binib bi kpa Uwumbor Aafuur Nyaan na, ni binib bi kaa kpa na. ³ Ubōnabr umāk len ke Yesu aa kpaln unii na kan, udaan ngbaan aa kpa Uwumbor Aafuur Nyaan. U ye Kristo aadin aabōnabr la. Ni nan ḡun ke Kristo aadin aabōnabtiib ga dan. Dandana wee, bi fuu ni dulnyaa ni a.

⁴ Maabim, ni ye Uwumbor yaab la. Uwumbor Aafuur Nyaan mu bi nisui ni na jer kinimbōḡ ki bi dulnyaa wee ni na. Nima pu le ni nyaḡ Yesu aadin aabōnabtiib ngbaan. ⁵ Bi ye dulnyaa yaab la. Nima pu le bi len dulnyaa aabōr, le dulnyaa aanib pel baah len pu na. ⁶ Tima kan, ti ye Uwumbor yaab la. Unii umāk nyi Uwumbor na pel taah len pu na. Unii umāk kaa ye Uwumbor yoo na aa pel taah len pu na. Nimina le ga cha ti bee binib bi kpa Uwumbor Aafuur Nyaan mu ye mbamōn na, ni binib bi ye Yesu aadin aabōnabtiib na.

Uwumbor ye ngeehm la

⁷ Maanigeekaab, cha ti li gee tōb. Ba pu? u cha binib gee tōb na le ye Uwumbor. Unii umāk gee unaabitiib na, u ye Uwumbor aabo la, ki nyi Uwumbor. ⁸ Uwumbor ye ngeehm la. Nima pu na, unii u kaa gee unaabitiib na, waa nyi Uwumbor. ⁹ Uwumbor nan tun ni Ujapōnbaal dulnyaa wee ni ke ti nan kan limōfal li kaa kpa ndoon na u pu. Nimina le mōk timi ke u gee timi. ¹⁰ Ngeehm aa ye ke timi le gee Uwumbor. Ngeehm ye ke Uwumbor le gee timi, ki tun ni Ujapōn dulnyaa ni, u nan sil timi aasisiiaan ki di

ubaa toor kitork tii Uwumbør, timi aatunwanbir pu. Uma pu, le Uwumbør ga di cha pinn timi.

¹¹ Maanigeekaab, Uwumbør aah gee timi sakpen kina na, ni ñan ke ti mu li gee tøb. ¹² Unii ubaa aa kee kan Uwumbør. Ti yaa gee tøb kan, Uwumbør bi ti ni la, nima le ti gee tøb mbamøm, waah ban pu na.

¹³ Tø, u tii timi Waafuur Nyaan. Nima le cha ti bee ke ti bi u ni, u mu bi ti ni. ¹⁴ Tinimbil nan kan Uwumbør Aajapøon, le ti jin seeraa ke Ute tun ni u dulnyaa wee ni, ke u nan gaa dulnyaa ni aanib lii. ¹⁵ Unii umøk len binib aanimbil ni ke Yesu le ye Uwumbør Aajapøon na kan, Uwumbør bi u ni la, u mu bi Uwumbør ni. ¹⁶ Ti nyi Uwumbør aah gee timi pu na, ki pak ke u gee timi la.

Uwumbør ye ngeehm la. Unii umøk gee binib n-yoonn mømøk na, u bi Uwumbør ni la, Uwumbør mu bi u ni. ¹⁷ Ti gee binib mbamøm ke ti li kpa lipobil bundaln Uwumbør ga ji binib tibør na. Ba pu? Yesu aah bi pu na, ti mu bi kina le dulnyaa wee ni. ¹⁸ Unii u gee Uwumbør na aa san ijawaan. Unii yaa kpa ngeehm mbamøm kan, ngeehm ngbaan nyan ijawaan u ni. Unii u san ijawaan na aa gee Uwumbør mbamøm; ijawaan ye falaa la.

¹⁹ Uwumbør le nan puen gee timi. Nima pu le ti mu gee u. ²⁰ Unii yaa len ke u gee Uwumbør ki yaa nan una aabo kan, u ye unyamøndaan la. U yaa kaa gee una aabo u unimbil waa u na kan, u ga ña kinye ki li gee Uwumbør u unimbil aa waa u na? ²¹ Yesu aah nan tuk timi pu na le ye ke: unii u gee Uwumbør na, u li gee una aabo mu.

5

Taah nyay dulnyaa aabimbin pu na

¹ Unii umøk pak ke Yesu ye Kristo u gaa timi lii na, udaan ngbaan ye Uwumbør aabo la. Unii umøk gee ubo aate na, u ga li gee waabo mu. ² Ti yaa gee Uwumbør ki

kii waaməb kan, nima le cha ti nyi ke ti gee waabim. ³ Ti yaa gee Uwumbər kan, naatataa le ye ke ti kii waaməb. Le waaməb aa pəw. ⁴ Ba pu? binib bimək ye Uwumbər aabim na nyaṅni dulnyaa aatəṅ. Taah gaa Yesu ki kii na, nima le cha ti nyaṅni dulnyaa aatəṅ. ⁵ Ulau nyaṅni dulnyaa aatəṅ? Unii umək pak ke Yesu ye Uwumbər Aajapəwən na, uma le nyaṅni dulnyaa aatəṅ.

Yesu Kristo aaseeraadam

⁶ Yesu Kristo le ye u nan dan dulnyaa wee ni na, le Jənn muin u nnyun ni. Baah nan ku u na, le waasin nyan. Naa ye ke Jənn muin u nnyun ni baanja la, bi nan ku u ki kpee, le waasin nyan. Uwumbər Aafuur Nyaan mək timi ke nimina ye mbamən la; ba pu? Nfuur Nyaan ye mbaməndaan la. ⁷⁻⁸ Jənn nan muin Yesu nnyun ni. U nan kpo, le waasin nyan. Nimina le mək ke u ye Uwumbər Aajapəwən. Nfuur Nyaan ngbaan mu mək ke u ye Uwumbər Aajapəwən. ⁹ Kina le Uwumbər ji seeraa ki mək ke Yesu sil ye Ujapəwən. Ti pak binib aaseeraa la. Uwumbər aaseeraa jer binib yoo. ¹⁰ Unii umək gaa Uwumbər Aajapəwən ki kii na, u pak Uwumbər aah len pu na. Unii umək kaa pak Uwumbər aah len pu na, u yin Uwumbər unyaməndaan la; kinye pu? waa pak Uwumbər aah len Ujapəwən aabər pu na. ¹¹ Uwumbər aah len pu na le ye ke u tii timi liməfal li kaa kpa ndoon na, ke liməfal ngbaan bi Ujapəwən ni. ¹² Unii umək kpa Uwumbər Aajapəwən na le kpa liməfal ngbaan. Unii umək kaa kpa Uwumbər Aajapəwən na aa kpa liməfal ngbaan.

Liməfal li kaa kpa ndoon na

¹³ M ḡmee tibər tee tii nimi bi gaa Uwumbər Aajapəwən ki kii na, ke ni bee ke ni kpa liməfal li kaa kpa ndoon na. ¹⁴ Ti kpa lipobil ki mee Uwumbər ki bee ke ti yaa mee u tiwan ni ye waageehn na kan, u ḡun timi aameel la. ¹⁵ Ti

yaa bee ke u n̄un timi aameel kan, ti bee ke ti kan taah mee u tiwan ni na la.

¹⁶ Unii yaa kan una aabo tun titunwanbir ti kaan cha u kpo na kan, u ga mee Uwumbər tii u. Le Uwumbər ga tii u liməfal. Binib bi tun titunwanbir ti kaan cha bi kpo na, Uwumbər ga tii bi liməfal. Le titunwanbir ti cha binib kpo na mu bi. Maa len ke ni li mee Uwumbər tii binib bi tun titunwanbir ngbaan na. ¹⁷ Lituln limək kaa n̄an na po ye titunwanbir la. Titunwanbir ti kaan cha binib kpo na mu bi.

¹⁸ Ti nyi ke unii umək ye Uwumbər aabo na aa ki tun titunwanbir; ba pu? Uwumbər Aajapəɔn kii u, le kinimbəɣ aan n̄maa n̄a u nibaa.

¹⁹ Ti nyi ke ti ye Uwumbər aabim la, ki nyi ke dulnyaa aanib məmək bi kinimbəɣ aajaal ni la.

²⁰ Ti nyi ke Uwumbər Aajapəɔn nan dan ki nan tii timi nlan ke ti bee Uwumbər, u ye Uwumbər bamənn na la. Ti bi Ujapəɔn Yesu Kristo ni, nima le ti bi Uwumbər bamənn mu ni. Uma le ye Uwumbər bamənn, ni liməfal li kaa kpa ndoon na daan.

²¹ Maabim, ni nyan nibaa n̄iwaa ni man.

Uwumbør aagbar

Bible without Deuterocanon in Konkomba

copyright © 2014 Wycliffe Bible Translators, Inc.

Language: Konkomba

Translation by: Wycliffe Bible Translators

Contributor: Wycliffe Bible Translators, Inc.

Copyright Information

© 2014, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The Bible without Deuterocanon

in Konkomba

© 2014, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

